

四庫全書

集部

欽定四庫全書

集部

蘇魏公文集卷四十八至五十八

詳校官庶吉士_臣朱理

檢討_臣何思鈞覆勘

總校官進士_臣朱

鈐

校對官編修_臣盧

遂

謄錄監生_臣施

華

欽定四庫全書

蘇魏公文集卷四十八

宋 蘇頌 撰

啟

謝館閣校勘

右某蒙恩充前件職者覆實胡門之禁觀藝非長寘名
渠閣之聯饗榮為甚異恩所被內省奚堪竊惟在昔承
平之隆崇右儒雅之選並建冊府內儲祕文時登翹又

之流以分繙於類例又擇該通之士以刊正於舛訛至
於讎對之員漸聞增置之目取人之路其任攸均逮祥
符好文廣鴻都之書副跡開元故事有麗正之官名中
經既充列職隨衆雖弗為通籍之貴方雜處寫宮之間
然而啟發篇章竄定朱墨並資殫洽之蘊是正文字之
殊如匪直能誰云稱選伏念某才性弗敏識致本迂逢
辰亨嘉就士間燕初聞家訓戒餘力以學文寢誦師言
務及時而進德旅從鄉賦僅策詞科得調三銓從事四

府卒因累日之課稍進列卿之丞刀筆為勞久奔馳於
外吏縑緗所志益愧負於初心希光英俊之游何階榮
進之望嚮者禁林為之列牘朝廷恤於孤臣料從隨牒
之卑收預試言之召愈慚陋學入賦嚴闡羣公尚蓋其
蕪辭假之優署上宰不遺於介善賜以甄成冒詔縉之
平除預書筵之亂綴磨研編削頗離簿領之煩躡纓整
襟日接閨臺之彥省循其幸遭會有繇此蓋伏遇某官
協贊邦猶主平時論樂烝髦於皇家思致治於責文人

挾寸長靡聞於棄用士名一藝咸見於獎收是令眇微
亦玷掄東眷所蒙之已厚期欲報以難輕固當負衷宿
官潛精志業考會字書之牯叅訂於前篇詳求畧錄之
餘更資於新簿冀成鉛槧之効弗累權衡之私

潁州到任謝二府

右某奉勅差知潁州軍州事已於今月日起上訖者久
玷書林驟紆州組去間就劇既懼且慚伏念某性本顓
侗學無師法常持是古之論未免詆譏進乏適時之才

自甘散滯荷承平之樂育獲儒館以優容寢厯歲蹕亦
更事局間輒謀於私便因請補於外官校中五經之書
僅成編目假二千石之守俄被選俞自國而南顧為善
郡長人之寄時號優恩昔之偃息以作藩莫匪朝廷之
舊望豈伊孤進遂此一麾斯益伏遇某官至誠與賢平
施稱物贊化鈞之獨運甄人品之衆流特矜羈拙之蹤
見處便安之地誠為厚幸庸詎勝言方今民力尚艱邦
刑未厯屢煩溫詔慎擇守臣自審庸愚方蒙任使敢不

度時所急思職當行察編齊疾苦之源副君相憂勞之意少收課最上報生成

謝知府密學

右某近者得補汝陰待期江介望封圻而弗遠趨賓闕以無由矧素荷於知憐但傾懷於風晤音騰闕禮簡曠成慙恭承肇屆春陽鎮綏民俗舍棠無訟考履多祥惟簪橐之巨賢本股肱之同體公權台輔之望衆議翕然弱翁治理之聲上知久矣諒俞音之匪晚佇歸節之權

趙某幸以世契之隆姑託陶成之賜騰裝有日去德罕
賒願勤遵養之方下副夙夜之禱

謝運使學士

右某去歲使旆過都嘗投謁贄逮歸去國輕遠恩門每
懷獎與之私滋劇系馳之素此者叨從郡補獲隸使封
揆材質之非長加吏文之弗狃惟民師帥之任懼無以
稱於選掄賴部刺史之賢固足以振其愚短竊茲循省
良用欣榮伏以某官性與道俱才為世出與學臻於聖

域高論懣於朝端步武中臺久躋清要之地案條近甸
暫倚詳明之才朝廷方佇於謨謀朝夕即登於要近發
乎經濟之縕惠彼蒼黔之民時乃舊游永依大庇屬方
涖事尚阻承顏願良以自珍副遙心之所祝

謝運使郎中

右某昨被朝俞叨從郡補屬布條之云始思裁牘之未
遑不圖信介之來俄拜篋封之辱味言滋溢懷愧則深
緬承副計之閑茂擁善祥之助恭以某官敏才經務冲

識鄰幾聲震仕途華登郎選蚤膺朝委已樹政於淞藩
俄東上心從贊謀於澤節坐叅調變行集富饒併疇膚
使之勞入被近班之寵屬拘官守悵阻風期惟倍保於
清襟冀遠符於詹系

謝集賢相公

右某伏念郡組遐縈久隔門庭之侍台躔委照忽紆簡
牘之頒仰荷眷憐居深感畏恭承保綏吉履增集天倪
伏以某官鼎棟元臣著龜舊德儀泰階於三象歌巖石

於四方筌牢同寅已載股肱之詠乾坤交泰坐凝社稷之功方屬炎歊未遑謁贄伏望上副毗倚精調寢興

回謝集賢相公

右某伏念仰熒煌之座每切於依投拜歎密之函曲承於眷記恭審調燮元化寶練生經神相是膺天和並集伏以某官道符典則行著儀刑明識以通古今重德以鎮風俗登翼惟新之政弼成可久之規四海之瞻久蒙於利澤百年之化方見於治平候屬商秋地遙賓閣伏

惟上為宗社精調寢興

賀叅政侍郎

右某伏審某官即拜言綸叅持政柄被恩惟舊聞命胥
權伏以某官鍾粹太和膺期盛旦奮材猷而入用契筌
宰以相求立朝盡諒直之誠賦政有將明之効繁機密
命昔叅賴於贊襄冢宰近司今薦移於寵任已積彌綸
之效允諧中外之心佇進上階永毗至治某素慚懵學
最荷深知推轂使前顧重恩之未答守符於外修慶謁

以無由

賀樞密諫議

右某伏審某官寵膺制綽進貳天樞凡被眷私舉同抃
躍伏以某官五辰鍾秀九德兼謨繇大對而結主知歷
旬歲而更器任常楊掌誥為一代之詞宗趙張撥煩居
三輔之治最入陪帷幄叅據廟堂誕揚經世之才佇正
秉均之拜某荷知惟舊聞命胥懼限州組之方拘企賓
階之莫及仰依陶冶徒結系馳

賀判府太尉相公

右某伏審某官拜恩典冊加數節旄坐移上相之庭就委三城之鎮翰垣增重寰甸均休伏以某官道德元龜朝廷隆棟入則順事於百揆出則宣力於四方勲業冠時忠規簡上嚮自宰樞之均逸暫從輔屏以觀風謝有善君固周邦之相慶虞咨州牧將柔遠以任能繼煩同德之賢久殿折衝之地藩軍成績已遂請於魚符當展待賢佇再調於鵠鼎某早游翹館久去恩門欣聆前燾

之還尚歎行郵之遠限拘州印阻詣賓閣

回提刑度支

右某叨隸使封阻親燕晤敢謂謙光之眷特貽函教之儀銜賜彌深增慚迨甚竊審詳廉之暇益全頤養之方伏惟某官國棟宏姿寶珩粹稟負首公之大節宣應務之劇才暫讞刑章允副寬平之望已聞召旨佇陞要近之聯隆暑向繁高閣尚邈冀精葆衛下慰傾馳

賀安撫侍讀侍郎

右某伏蒙某官光膺中詔出鎮巨藩凡在提封舉深慶
抃恭以某官嶽符稟秀寶緯生才文窮述作之原識周
治亂之體奮揚世美顯服禁塗授將鉞以臨邊繼收豐
績侍殿帷而摘句屢告嘉謨懇辭京劇之煩請殿封圻
之近憩旌伊始坐閤攸安矧望在於廟堂豈久留於方
面佇聆迅召入副疇咨某被顧有年邇風尤切幸隸名
於使管阻執贄於賓閣心所嚮翹言非殫究

回知府觀察

右某伏念嚮預朝趨每瞻顏表洎承郡補益遠門隅寢劇遡風之誠罕通執訊之間敢云貴要顧此冗閑紆翰勒以為儀篤情文而示好言因喜溢固多虛獎之談志以方回乃盡勞謙之意祇循惠好豈廢中藏伏以某官生質粹純才資敏給席公侯之餘慶簡睿聖之深知譽洽士倫恩隆戚里廉車命秩誠德位之相先使竹臨民矧政刑之允濟已從詳試即佇褒遷限封壤之正遙接燕言而未遂願順生經之固少符善祀之勤系慕所深

究宣匪逮

賀知府龍圖

右某伏審光膺朝檢出布藩條凡荷眷知舉深并躍恭
惟某官學窮精稷德富誠明繇邇閣之敷經踐禁塗之
持橐歷更典領益著謀猷間得請於黼帷遂均休於符
守初聆頤節已傳來暮之謠矧在鄰疆竊幸餘輝之庇
方修贄禮遽損占書載循喜溢之言第劇欽銜之素封
郵雖邇音旨坐遙佇聞召節之頒前慶近樞之拜炎威

如熾鈴閣方休冀眠食以自將副夙宵之所禱

回祥符知縣郎中

右某伏念符守拘縻標額阻邈徒切邇風之想寢稽染翰之儀遠貺華函曲敦重禮眷此晚生之無似奚堪舊德之相先銜愧自中刻銘罔替伏惟某官士林孤秀朝路通才試政事以甚詳藹聲猷而彌遠郎省時之清望久爾踐揚赤縣國之要官重茲委用已著循良之效行膺顯近之資姑冀護調少副勤企

回同年著作

右某伏審同年著作被諸府之薦能副三銓之覆實拜
恩槐陞進秩蘭臺素推應務之才茲實漸磐之始夙叨
朋好竊忝榮陞官次坐縻展慶儀而未逮謙撝遠篤紆
華幅以為先展味懿辭欽承重禮但感銜而不足遂藏
去以無忘時方用才日遲登俊永言傾嚮匪假周談

賀留守相公辭太原再領西京

右某伏審某官光被贊書進崇命數推至誠而確讓止

褒冊之既行特帖後恩即移舊府義激周行之次歡騰
近甸之間伏以某官與學際天元功冠世熙帝之載則
書叙九德之歌知幾其神則易稱萬夫之望自兩登於
魁柄皆弗處於盛名委政廟堂出藩畿甸邦國若否昔
賴山甫之將明輔相重輕今繫晉公之出入昨以虞州
咨牧漢冊圖勲坐移丞相之庭往殿太原之壤端揆崇
秩所以尊師長之賢尹正重名所以增方鎮之體矧粉
榆之故里佇旌纛之來歸而相公內樂安閑弗榮寵利

亟露章而懇叙務辭爵以彌堅宸扆為之動懷朝制因
而収汗止拜常山之節還臨洛宅之都俞命傳聞羣倫
懔歎竊謂筌宰相契上方有舊人共政之求寓縣具瞻
下益思大鈞播物之惠雖暫諧於冲志諒即被於疇咨
三冠鼎槐抑有本朝之故事再開鑪冶將副率土之傾
心某早荷甄収方塵郡寄側聽保釐之始欣依臨照之
餘恪守印符莫獲修於慶謁傾馳懇素姑永託於生成

賀知府龍圖諫議

右某伏審茂膺恩渥易守藩宣伏惟慶慰恭以某官清德藹躬懿文邁古逢會光華之旦徊翔清切之塗輟內閣之論思均侷人之委寄政成惠洽民詠朝咨再勞撫俗之仁來綏近甸佇對馳軺之召亟進通班繼賢世之令猷畢宗工之能事某忝分州節仰託使封恭聆坐閣之初未遂趨隅之謁傾依盛德曷諭丹誠

謝二府

右某嚮以忝恩為郡便日布條循公式以騰書遡台庭

而露懇地有常尊之隔禮無宜答之文豈謂某官牧德
至虛降心小物乘政司之多暇紆記室之報章眷舊甚
勤特屈廟堂之範披文未既頓生州郡之輝惠賜不訾
感銘無盡恭審內贊邦家之務助宣天地之和六氣茂
康百祥叢集斯文未墜天方降任於哲人至治在辰上
且仰成於良輔敢冀勉遵於時令順護生經益副萬樞
之毗更增九鼎之固某限拘使竹坐隔翹材竊深豫附
之情永賴陶成之賜

轉官謝二府

右某此者伏蒙制恩特授前官者攸司上課成命下頒
進位甚優省躬斯愧伏念某小才曲藝孤進晚生叙歷
朝闈浸塵儒館懷鉉雖久書未畢於汗青請郡既行詔
遂分於半竹凡更內外頗涉歲年屬大比之甫期乏寸
勞之報最公朝平施著令應遷擢聯三署之行仍躡左
曹之要異恩所被非服是慚此蓋伏遇某官陶冶百工
權衡衆職使士大夫各稱其任無賢不肖皆用其長心

推至公道弗異遠眷是顓愚之質薦蒙樂育之私增秩
留州荷深仁而已至悉心為政惟來効之是圖將論報
於生成敢殫勞於夙夜

轉官謝監司

右某此者叨膺制綽叙進郎曹寵渥所加庸虛靡稱伏
念某天資弗厚學術固踈仕厯朝闋職塵儒館內掌故
事於時無益於毫分出領近麾臨政未聞於善最屬攸
司之大比緣滿歲以應遷增秩甚優冒恩為愧此蓋伏

遇某官澄清使部振肅治綱羣吏臧否賴案廉而悉上
公朝黜陟俟贊啟而後行非才所蒙其姑錄此但益勤
於吏職期不累於已知

提刑轉運先狀

右某伏審某官差日登車便時行郡冒潦塗而匪易擁
茨福以無虧露檄諸城已稟行臺之範屬鞬近次佇修
列郡之儀瞻望風徽竊深悚抃

賀運使度支

右某伏審某官內膺制綽出領使權伏惟慶慰恭以某
官文懿學純德方氣直夙擅儒林之譽蚤登郎署之榮
司會佐籌朝用富彊之畫近畿案節上咨良直之謨行
觀風績之騰聞入副宸庭之顯用某適叨守郡獲事提
封第傾賀履之誠尚阻承顏之願其於欣激曷諭端倪
賀知府侍郎

右某伏審光膺中詔榮鎮巨藩伏惟慶慰恭以某官秀
稟天元識探道奧蚤躋榮於顯路自結知於上表屢分

圭竹之咨薦著循良之効撫綏方面坐期風教之凝進
拜樞衡式副巖瞻之詠春陽伊始使傳方勤願益保於
生經庶遠符於私禱

賀淮南運使

右某伏審顯膺詔檢榮總使權伏惟慶慰恭以某官秀
稟天元識探道奧自結宸旒之眷爰陞郎署之華日著
聲光屢厯藩宣之委朝資經度總司兵食之饒利毫坐
析於江淮風節聳驚於郡邑竚迎褒召別踐顯嚴豈惟

協輿議之歸故可展大賢之效某比拘班教尚阻承顏
冀順保於生經庶益符於私禱

回侍讀

右某言念奔馳吏職隔濶俊游嚮義雖深親賢未遂豈
云明哲之見顧貺以緘書而示情德盛禮恭有勞謙終
吉之美道同志合推相下不厭之心自惟薄才徒服高
誼恭承紬次於儀典方勤啟發於篇章累朝所行一旦
大備自非精思之敏曷究淵源之來勉冀護調將副咨

用區區所禱喋喋靡宣

回壽州知府到任

右某伏審某官出持使節已署郡條頒仁政以便民聽
風謠之載道矧素推於才譽已詳試於良能諒非瓜戍
之期即被璽書之寵別躋顯用乃協輿言某叨假便麾
幸依鄰壤方竊潤河之廕遽承占牘之貽欽佩多儀但
深於刻著緬懷懿範深切於系馳姑願珍調少副勤祝

回知府內翰

右某伏以天府浩煩之地任峻時權複門演潤之司職
崇內著側聽恩俞之始實增抃蹈之誠恭惟知府內翰
與學輔時懿文華國魁甲多士羽儀盛朝暢風教於近
藩備諮詢於法從龍荒結好生原隰之光輝黿禁代言
增訓辭之深厚暫勞治劇即慶登庸敢意眷慈特貽手
問荷謙撝之有素激悚抃以逾深願勤導養之方少副
傾祈之素

回伴讀郎中

右某伏審趨召節之嚴已修陞見視宸闈之學爰涖官儀裁慶問以未皇沐勞緘之猥及載惟謙厚增切悚銘恭以某官直道被躬純誠許國謹信自任祕溫樹而不言清廉所高潛郎曹而為樂國藩初建聖慮攸先式顧老成之風首膺進讀之任春陽在候燕晤未涯倍冀珍頤用符誠禱

回廬州知府郎中

右某近者使艤過郡獲修摯見之儀征旆首塗旋愴風

期之遠辱華賤之猥及荷厚意之彌深竊承涓日惟良
布條伊始幸接瓜鄰之末實依河潤之餘恭惟某官植
操端方懷誠審諤出被藩朝之委入分財計之司聿眷
耆明均休近輔矧淮淝之興壤控南北之通達英節之
臨實均於方任甘棠之愛佇見於詠歌春律載陽晤言
正阻倍祈保衛式副企瞻

回鈐轄

右某嚮叨共事幸親談燕之娛俄屬改轅遽悵聲容之

別方深企德猥辱占書竊承衝涉之勞無爽和倪之妙
恭以某官清規格物淑聞藹時蚤緣眷眷之隆薦領兵
防之寄謀惟可倚講練尤精諒匪俟於終更即別膺於
峻召披風正遠珍食是祈欽祝之誠旦夕以冀

回郢州知府學士

右某嚮者某官輟蓬山之直紆富水之章聆涓便辰即
署新政頒春庶俗已騰愷悌之謠講好宅邦遽建緘書
之禮自惟亡狀素辱與將相望隔於封疆馳神劇於歲

月恭承惠好增激感悚竊以某官修性淳明執道深固
學術足以表於士類政事足以達於民宜入觀石室之
書已大正於訛失出假竹符之守蓋暫試於才猷異時
從橐之求當首追鋒之召朋從之分企佇實勤惟善御
於沖和副祝祈於旦暮

上交代職方

右某伏審光膺綸檢就領州章伏惟慶慰恭以某官識
量淵淳風猷沈正屢更事任益著聲光薦仰副於朝咨

來暫分於州寄自慙前執得忝交符佇臨滿戌之期併
叙與游之舊初炎在候珍食是祈行趨台節之嚴別踐
顯塗之峻

二府賀冬

右某伏以日御迎長斗繩維北地雷衍畫慶叢陽復之
亨鍾鼓布庭儀盛歲元之亞恭惟某官道躋民極德配
黃鍾宣曜三階之符參和六典之職信功順事有若虞
之臯夔應變守文則為我之姚宋適履嘉辰之會方毗

至治之期益介壽祺永扶運祚某限持州節阻奉慶觴
素翹館以馳誠託書筠而寡喻

外任兩省賀冬

右某伏以室琯升陽臺雲紀瑞輯朝圭而展慶獻紋履
以迎長伏惟某官性蘊端方德猷純茂已試大儒之効
自結明主之知蕃宣屏翰之勞四方稱誦輔弼疑丞之
任匪日登咨乘吉旦之嘉享擁祥經而脆厚某限榮州
組坐隔賓軒祝望瞻依倍百常等

鄰郡賀冬

伏以天正開統日晷迎長挺柔荔以應時候飛葭而布琯伏惟某官躬富才美治稱循良方開吉祿之榮益饗純禧之茂各縻官次阻叙慶儀但勤致祝之誠莫究傾思之意其於祝嚮曷既聲言

二府賀正

右某伏以七始推元三正建朔布典常於王闕會朝貢於春庭穀旦惟新近司叢祉恭以某官天鍾全德體蹈

大方協期運之休明應階符之炳耀內總三事朝廷以
之尊榮外撫四夷方隅以之底定適屬履端之始允膺
畀壽之祥永輔熙平式光才美某守符於外贊謁無階
瞻望門牆但馳誠素

外任兩省賀正

右某伏以履端於始史氏所以正三朝以正次王春秋
所以尊五始矧會得天之數見臨交泰之期恭惟某官
直道體和嘉猷濟衆緣飾真儒之事布宣明正之恩近

旬列藩被仁風之浹洽元正上日開福履以駢繁乘此
春祺行歸禁路某拘官有守叙慶無階禱嚮瞻依實倍
彝等

蘇魏公文集卷四十八

欽定四庫全書

蘇魏公文集卷四十九

宋 蘇頌 撰

啟

謝知制誥

右臣蒙恩授前件職者驟塵清禁仰服華褒才不副時愧無容處伏以王者審乎出令莫重訓辭儒臣職於代言是為華選自百篇之義缺洎七制之主興代有裁成

之文形於播告之指述辭意則貴乎深厚而爾雅語詔冊則欲其昭毅而和莊象夫揚庭言之文者行之遠演絲成緯體之大者述之難必資起草之工以贊發中之命右文在旦多士盈朝除書德音如常揚者時不乏言語侍從比朔臯者未足多光輝簪橐之聯增峻陞廉之等繼登茲選未易其人如某者才非有以絕羣學不足以適道屬少孤之多難常苦節以自持不辭小官蓋竊逮親之祿入望大利固無經國之謀幸當路之為言預

複門之試可進登書府涉厯歲華職有屢遷效無薄最
間奉召趨之一節入塵記史之二星載筆赤墀已玷從
官之末著篇黃閣遽膺寵典之優陞置掖垣典司渙令
矧右曹之清秩實先子之嘗僚深愧鰥生復仍故職坐
卧敢當於舊位翼成懼棄於後基世掌絲綸徒竊古人
之美習知臺閣誤先寒士之求此蓋伏遇某官協贊聖
辰主平公論士無愚哲咸歸品目之明言有吁俞素啟
上聰之聽是令踈外辱在甄成敢不刻志始終匪躬朝

夕奉遵職禁道無替於守官圖報國恩心不忘於知己

亳州到任謝二府

右某蒙恩差知前件州已到任上訖者隳官責薄敢辭
遠守之勞易地恩優再竊近藩之寄適由便道遂此布
條叨幸居多悸惶曷已伏念某挺至愚之稟無適用之
才頃冒憲章上孤樂育一麾出守已荷曲成之私六輔
陪京遽膺內徙之寵度命始臨於位表銜恩宣在於他
門此蓋伏蒙某官推致大中之原輔成至治之極振滯

淹以廣賢路靡有遐遺棄疵眚以盡人材俾其自效良
慚懵昧復被甄收猥從僻陋之邦寔獲便安之地奉循
詔令當官彌念於匪躬追省愆尤勦力尚期於晚節

亳州到任謝兩省

右某近膺朝命易守輔藩方其莅事之初屬嬰多故惟
是奏書之緩深愧非儀姑勤企德之誠猶惕負恩之誚
伏念某早由孤宦誤擢近班不職稽違坐鑄西省之籍
至仁惻隱出假東陽之麾郡壤雖遙土風甚媿頒條暇

日但思追省於愆尤去國踰年不幸重罹於憂患旅懷
多感榮仕寢忘豈圖易地之優獲在陪京之列非惟出
於遠僻且復便於私營此蓋某官以直方之道致君以
忠恕之心格物外收棄置使有漸階自慚疵眚之餘未
副稱揚之惠寬其罪咎旣蒙觀過之知勤於吏資敢怠
當官之效心之蘄嚮言豈勝陳

賀昭文僕射相公

右某啟伏審某官筆述聖經書聞宸扆言綸誕告秩增

左相之崇台鉉兼華地進東臺之長式彰儒效永化人
文恭以某官生德自天潛心於古立言垂教若稽姬孔
之猷熙載奮庸無媿臯夔之業閔學者之師諄欲聖人
之指明間奉淵謨講詳典籍之奧獨推卓見發明義理
之歸甫終汗簡之功盡革顓門之陋微言之緒復續於
當今大道之行可期於茲世宜服寵嘉之渥進居師長
之尊多士是依萬邦攸慶某拘嬰符鑰阻拜門藩涵泳
塵編常患迷塗而擿埴叅評舊學將期發覆以開明竊

抃之誠喻言曷旣

回交代資政侍郎

右某啟伏承某官請麾便郡移節近圻尚稽緣鵠之謀
再遂左魚之適顧惟鄙陋夙忝從游慙無告政之能將
幸承顏之便雖嘗奏記已愧後時豈圖公輔之尊曲徇
平懷之體遠紆教尺過著謙撫兩紙八行固親踈而有
意一日三復姑藏去以為榮伏況丹宸虛懷明庭佇告
宣止平生之交義久俟彈冠諒惟遐邇之心咸思躍

治郊迎有日股抃尤深更祈匱薄之餘益厚將綏之祉
乃情企嚮臨紙奚言

回知府經略密學

右某啟伏審顯膺褒詔進直內樞勲望益高輿情胥慰
某官器能閎博智略淵通早推望族之華復擅文場之
秀踐揚中外歷試劇煩制閫西陲進拓金湯之固斥疆
遐服盡收冠帶之民躡躋禁密之聯蓋示疇咨之漸方
欣異數遽枉華緘祇認眷私銘藏悃素

回知府內翰

右某伏念邊遠門序第傾企嚮之懷恪守郡條時闕與
居之間敢期隆顧遠辱貽書銜眷良深增慙固甚竊惟
剗劇之裕無爽頤生之和伏以某官時棟上材聖門高
第文章國之經緯德業民之表儀自奮躍于天衢遂簡
知于黼座雍容禁複潤飾玉猷不離侍從之聯總治浩
穰之地名威已振儒效益彰諒匪俟於累朝定進陞於
四輔暑躔加畏賓館尚賒伏冀精調庸副虔禱

回知府內翰

右某伏審某官寵膺朝制正尹都畿以文章侍從之才
治衆大劇煩之地未勞餘力已副具瞻伏惟某官賢業
絕人忠言許國入當三冊之問遂冠四方之豪黼座虛
懷待以公卿之器金坡進直演成謨訓之辭上方以吏
事而任三公時皆由選表而登二府今煩俊哲而為治
實賴威名而鎮時諒匪累朝遂登大任某久游材館方
假州符阻贄謁於賓閣但馳誠於天邑

回南京權府運使中允

右某此者叨膺制命獲守留京自省庸虛有慚寄任竊
念某所憑不厚自視無竒徒用簡編之資漸階臺閣之
選未蠲謫籍復叙郊禧閱麗正之圖書再塵儒職委離
宮之筦鑰繼荷恩章矧近府之會衝豈非材之宜揔顧
惟多幸得在提封奉行新書敢不悉心於庶務振舉大
要方將稟誨於外臺豈謂某官屈使範之威眷朋簪之
舊日折千里俯勞臨泣之煩手札八行先枉勤渠之問

披尋辭意銘篆膺心佇趣辦嚴之期即修謁贄之禮自
餘惓歎靡俟究宣

回南京通判郎中

右某言念析符南服再越於歲替易地近疆薦叨於恩
制適從便道遽此頒條企望藩封竊喜仁隣之援拘縈
官守無階晤語之期豈謂某官眷舊情深撫謙志篤特
遣行人之使首貽累幅之書褒以榮辭茲見相先之範
藏之私褚彌敦永好之隆坐阻風徽難宣感悃

回防禦太傅

右某啟伏審朝門覆實文躋科等之優英節超恩秩峻
州防之寄宗藩擢秀士論推高竊以國家系本仙源慶
流屬籍九族以睦廣帝堯文思之勛半楚而封盛炎漢
王公之制寵拜雖緣於世緒褒甄必校於藝能時有卓
爾特立之才上副褒然首舉之選恭以某官性資明敏
問學該通志外綺紈之華躬持韋布之行河間好古樂
與諸儒而並遊更生屬辭遂偕羣雋而進拔俄給上方

之札高中有司之程大對危言帝每篇而稱善通侯列
爵位不次以加榮匪惟冠映於懿親固亦輝華於多士
某欽聞時譽阻遘風期官守攸拘展慶儀而莫逮親賢
垂眷枉翰尺以先貽載觀揆藻之華但切覲顏之愧無
緣燕接益用銘衡

回河東都運諫議

右某啟伏審某官寵膺詔綽進擢諫坡仍畱將漕之權
且重撫封之寄素叨眷與竊忤鄙悰竊惟某官方正自

持清通不澆早服教忠之訓久彰應務之才贊劇治煩
風力稔聞於臺閣頒條刺郡聲猷夙簡於朝廷惟唐晉
之舊墟搃戎羌之衝地均輸所寄功最薦登坐收制勝
之謀就拜褒賢之典陟天子諍臣之列已峻近班繼大
門先德之榮益為盛事敢意謙光之重不遺棄置之餘
首貺賤封過敦禮範荷明哲久要之契銘著不忘祝公
台大用之期傾依有日乃誠虔企臨紙奚言

回瀛州安撫待制

右某啟伏審某官被發中之詔膺謀帥之權進班禁閣
之遊杖鉞瀛關之壤時登雋哲士有輝光伏惟某官以
奧學清文羽儀臺閣以英聲茂實簡在朝廷向自書林
之校文出分漕輓之將命兩淮川陸之會肅抗風稜二
史言動之司旋歸禁從方告猷於帝右復領使於朔陞
引鍛運籌薦修農戰之備鑿門推轂遂有軍師之求寵
加荷橐之聯益重元戎之寄為光清世襲美德門緩帶
寢兵已擅羊公之譽緇衣善職行歌鄭武之詩某早被

眷知久違英晤自聽撫邊之拜久稽奏記之儀何大雅
之謙撫不崇體貌顧並遊之冗外特貶絨書豈惟荷聲
氣之所同抑亦增茂悅之深慶在於欣激難悉條陳

杭州到任謝二府

右某蒙恩差知前件州已到任上訖者全吳故社寧海
雄藩異時禁近之巨公出為屏翰何意斥疏之遠跡遂
許長臨適茲賦政之初深愧冒恩之厚伏念某器非閎
遠躬負愆尤絕覲榮塗止期祿食昨罷睢陽之筦入趨

魏闕之朝典領圖書幸與諸儒之踵武出入臺省得階
通綴之班聯會江淮之薦饑煩宵旰之遐慮咨求良牧
偶擢匪才受命飲冰敢自營於私便之官便道即宣布
於上恩方事之叢以榮為懼此蓋某官道佐明主德施
遠方眷東南隅之民尚艱粒食擇二千石之吏俾乂海
邦再省孱虛奚堪責任敢不上體朝廷之意恪奉詔條
拊循家戶之人使安田里庶幾免過仰副至公

回越州知府大資

右某啟此者叨分朝寄獲假州符惟東南之要衝當燬
災之為沴宜求宿望出布上恩顧茲蹇躓之餘素乏循
良之譽誤膺咨牧來此長人受命飲永姑夙宵而增惕
之官便道頒條詔以云初伏遇某官暫輟政機出臨藩
閫封疆千里幸依鄰國之光坯冶一陶更佇化工之賜
敢謂謙撓之德特紆款密之書味藻思之彌高但銘丹
臆望翹材之甚邇阻侍清塵感嚮之誠敷陳無盡

回致政太傅侍中

右某伏念假使竹於一方跡縻江海望翹材於千里目
斷雲霄居慙走俗之勞遂闕問安之禮自惟簡怠宜取
悔尤豈謂某官陂量兼容台躔委照固燕居之多暇裁
尺素以見貽兩紙八行親枉鍾毫之妙片言一字意踰
魯筆之褒兼聆高蹈之間固有多祥之集非徒感誦并
用欣歡重念孱虛夙承獎拔離奇為器曲成特出於化
工連蹇違時棄置自甘於散地悵舊恩之莫報嗟末路
之攸拘慕赤松之遊無階企仰祝大椿之筭但極傾馳

上西川知府端明侍郎

右某伏念辱知素深去德滋久下邦假守顧簿領之攸
攬上館馳誠通記函而殆闕緬惟德履時擁天和伏以
某官道繫斯文名重當世立朝則遽史之載直作鎮則
方召之告猷西南一都已榮後拜之寵左右四輔佇繼
緇衣之詩尚阻趨隅倍祈良食孤羈之跡陶冶是期

上大孝昭文相公

右某啟伏以某官以不時出之才內輔朝政以大丞相

之重躬執親喪伏自倚廬西還灰籥屢變聖上惟同體
之義夙夜注懷士民思造物之仁邇遐延首諒典冊之
前降期鑪冶之再開蓋本朝故事之當行況上公虛位
而佇復將兩全於忠孝宜俯就於情文某二紀荷知八
年受賜迹留書館悵去德之踰時恩假州符盡提衡之
素惠限茲遙阻未獲瞻承中心欲陳萬一奚究

回登州知郡司封

右某啟向者某官奏南司之課膺中詔之褒進左曹於

省聯領奧藩於海裔蓋切循良之選爰咨端諒之能自
承擁傳之去東居悵拊塵之坐隔懷鉛自窘未遑緘候
之儀占牘不忘首辱惠存之問聆布條之伊始惟善俗
之有方政務多閒福基衆厚伏以某官與學敏識峻節
孤風得古人之清通為來者之矩矱郡邑之政沛然謠
於民言臺閣之模凜乎肅於朝著方倚直繩之用遽膺
半竹之行昔者由御史而為省郎唐官謂之清望出諫
官而補郡守漢臣因以自陳矧惟碩哲之謨允協前良

之美諒茲出守聊為外資詠中和之詩已宣於主澤還
顧問之列行奉於帝俞榮據顯華之塗參為孤拙之庇
適臨歊暑坐遠清言願導御於氣冲冀冥符於善禱乃
情依嚮舐筆奚殫

回宿州知郡郎中

右某啟伏審某官出分使節已布郡條頒仁政以便民
聽風謠之載道矧素推於才譽已詳試於良能諒非瓜
戍之期即被璽書之寵別躋顯用乃協輿言某素偃聲

猷幸依隣壤方切餘輝之燭首貽尺牘之貽仰服謙撫
但深悚荷

賀樞密相公

右某伏審某官寵膺制冊入冠樞庭賢哲在朝中外交
慶恭以某官謨資六德道贊九功二紀奮經綸之謨七
年當鈞冶之柄致君之慮達於天淵許國之誠貫於金
石庶務由之清穆百度為之和平曩由陟屺之哀始正
居廬之禮三年之孝已著於儀刑羣辟之師再符於夢

卜惟新大政爰任舊人僉諧元老之尊特重本兵之地
山甫文武之憲式副簡求傳說鹽梅之和聿隆瞻望某
拘縈使竹阻造賓墀仰明命之誕揚倍常倫而懼忤

回告諭太保

右某近者伏承某官出諭帝宸之旨循行侯服之遙惟
是末封獲瞻茂範雖喜接辭之便且慙為禮之踈屬軒
旆之不畱恨風規之遽隔料惟登頓無爽粹和適茲疾
置之來首辱華牋之貺謙撝過厚感戢奚勝矧以聖政

惟新遣使就安於列壤時才被選抗旌允副於上心諒竣事以還朝已疇能而被寵清秋伊始閱館正遙冀眠食以自珍慰夙宵之所禱在於傾嚮靡迨周陳

知府祠部先狀

右某伏審某官榮分漢節出鎮淮藩驅大旆以戒行歷弊封而甫邇悠塗冒涉諒無爽於履祥近境將迎佇恭投於典謁乃心所嚮須面殫陳

回觀察太尉

右某近審某官懇請州麾出觀藩政方布便時之治已
騰來暮之謠朝寄值才士論歸美矧屬戚賢之望累更
中外之煩風績素隆柄任伊漸承偃藩之多暇傳占牘
之斯來仍顧鰥生均紆厚禮榮辭見假本由巽下之誠
高誼所臨永訂要言之好在於感惕萃乃棕襟當寒律
之正嚴諒神倪之益泰更勤輔養遲對寵嘉區區之心
喋喋無喻

回省副

右某言念縈縻麾守隔關門闌雖傾嚮誼之誠久闕馳
郵之問敢期謙顧遠墜牋封諦味情文交輸悞臆忻承
副計之暇無虧養浩之方恭以某官道本直清志敦恬
裕逢辰奮於才美載世踐於顯華使節觀風宣四方而
著效計庭參畫通九府以收勲諒弗俟於累朝即別膺
於大任炎暉已熾宗館方遙尚冀精調少副詹禱

上陵使相公

右某伏審某官暫違宮闕祇事寢園營萬世固安之撫

慰兩宮哀慕之志恭惟已竣陵域歸止廟堂忘履跋之
為勞固神明之薦祉伏以某官清寧間氣道德元龜文
武憲乎四方謨猷宣乎九德昨者先皇厭世嗣聖承祧
綴衣在庭首當顧命之屬同軌至會躬案因山之儀方
大號之惟新賴庶綱之有寄熙帝之載邁虞書股肱之
歌王功曰勲紀周人彝鼎之器永光鴻業允副具瞻

回太原經畧相公賀冬

右某啟伏以灰飛氣應厯推天統之元剛長朋來易著

乾陽之始伏惟某官任隆三事望重四朝輟端揆之彌
綸布藩宣之條教簡簡降福慶已協於迎長巖巖具瞻
民共歌於畫一敢期謙德遠貺華牋仰承眷與之私采
積悚銘之素莫遑面叙愈劇心搖

回賀冬

右某伏以珠躔起歷竹律生音斗指子以平時氣萌泉
而任物恭以某官公忠挺操幹敏馳聲適逢會於亨辰
將茂迎於蕃祉限拘麾守阻奉賓儀方結慶懷首蒙華

問祇佩眷勤之意但深悚企之私

蘇魏公文集卷四十九

欽定四庫全書

蘇魏公文集卷五十

宋 蘇頌 撰

啟

濠州到任謝二府

右某蒙恩差知前件州已到任上訖者非才尹劇誠不
厭於人言有罪出麾復得臨於民政去都不遠便道匪
勞初省詔條有慙面目伏念某識無遠大智乏周防誤

被宸俞使承府治謂諸僚皆朝廷之選故信任而弗疑以兩造非姦慝之人故寬舍而不問豈意吏曹之乖謬致煩詔獄之推窮無由自明分甘重責荷上恩之含垢原所坐之因人止免一官仍除善郡此蓋某官致君以道用法不私方百度之惟新靡容於曠事或一物之失所每惻於深仁俯矜多難之餘陰有曲成之造迂踈獲譴固宜置散以投閒衰暮貪榮尚爾為貪而竊祿敢忘內省仰答殊私

滄州到任謝二府

右某蒙恩差知前件州已到任上訖者上盟津之符特
寬既往之咎假滄海之節再荷曲成之私逮此布條徒
深嚮德伏念某所憑不厚自知甚明智畧不足以適時
宜操修非有以過人者冒塵禁近初以妄言而下遷試
守劇繁復緣縱舍而連黜每思薄祐絕意榮塗誠宜置
散以投閒姑務省非而責已收還印綬已慚天幸之多
擢守藩方抑懼人言之嘖矧茲邊寄匪用次遷顧敗官

不職之餘才非其稱惟振廢起淹之舉恩有所歸此蓋
某官心推至公道在博愛賞刑無濫雖賤微皆軫於哀
矜故舊不遺在鄙薄尤蒙於假借委之善郡慰彼衰年
惟堅匪石之心少答在鈞之賜恩闕千里魂幹九升戀
戀之誠云云何及

回運使兵部

右某啟伏審某官露章辭劇剖竹為藩輟使務於冀方
殿鄉邦於江國主知素厚暫諧卧治之榮士論所歸行

聽節趨之寵眷言屬部悵失餘光方深去德之思忽枉
摘華之貺函縉禮拜手迹以彌勤大旆嚴行望車塵
而益遠更祈良食少緩遐心

回知郡郎中

右某伏念壤甸相望徽音坐隔雖嘗寓訊未諭馳情遠
承教牘之貽過篤謙摛之意聆風為慰銜德無忘伏惟
某官生質渾深材資敏邁本閨臺之積譽副州郡之選
能師帥承流已報成於政治朝廷重外方表任於循良

願益將頤佇聞咨擢乃誠所嚮臨啟采勤

賀禮儀待制

右某伏審某官進膺言綽榮踐禁塗辱與交從竊深慶
抃伏惟某官耆儒宿望懿行深資逢辰早躋於文科奮
藻不離於經術先帝天飛之日眷注已隆邇英晝訪之
游登延且久近序偏更於典領同時共歎於淹回黼帷
動求舊之思天閣慶登賢之拜內備顧問雍容持橐之
榮入告謨猷旦暮沃心之熟某久睽風晤喜聽咨俞方

嬰簿領之勞早闕緘滕之貢敢圖厚眷先貺華牋雖親
踈而禮意均本由謙重然貴賤而交情見衆荷撫循徒
深悚戢之懷莫喻傾輸之素

上致政郎中

右某伏念櫻郡鈴之紛擾少曠馳郵瞻燕几之優閒常
深企德緬想興居之暇益臻輔養之和伏惟某官樂道
希夷處躬溫厚早遂冥鴻之志高辭振鷺之羣歸里巷
以安躬推先士望賁丘園而養素用固天倪漸屆熙春

尚遙省晤倍祈保攝式副傾翹

回提舉著作

右某啟近因歲首嘗寓慶緘尚未徹於省觀忽先紆於翰尺曲敦禮範備見愛思矧在州封方承使旨惟奉循之恐怠賴寬假之已多敢冀謙撓過垂眷獎拜手筆八行之貺愧荷殊深限淮山千里之遙披承永日更期珍護別佇寵遷欽企之誠一二奚究

回恩州知府皇城

右某啟近者之藩假道獲款於賓閔折俎飛觴復陪於
燕衍屬迫官期之近不終朋舊之歡去德未幾合符伊
始託善隣之庇方企於風期裁占吏之書先承於惠好
且審侍鈴之多暇允臻泰宇之嘉祥宣布中和已協惟
良之譽登延近密行膺不次之榮適屆春和益綏冲履
其於感系未易殫陳

回冀州知府左藏

右某啟自承榮領使權幸依河潤沈迷鮮暇未遑竿牘

之儀謙假過隆首辱牋滕之貶仰循重意載戢丹悰伏
惟某官忠諒承家詩書蘊學稔武名於朝寔藹政譽於
邊藩鎮撫外夷方賴折衝之畫光華近著行膺簡在之
恩尚阻晤言倍祈遵養傾依之素鑒寐不忘

回知縣太博謝改官

右某竊承某官上課天官拜恩綸制榮進曲臺之秩益
開近著之班夙忝與游欣聞新渥猥辱書滕之貶曲形
謙槩之隆銜戢於中諭言靡託矧以某官才名夙茂風

譽兼優百里之治絃歌久彰善治三年而比績用已被
榮褒佇別對於寵陞乃奮揚於素蘊末期占晤姑罄禱
虔

賀新恩先輩

右某啟伏以右文興治盛德撫辰廣求天下之英皆與
穀中之選詔書一下士類四臻承平百年用此數路刈
薪之效而得乎翹楚育材之久而見乎菁莪必須異能
以備優等伏惟先輩學漸聖域文舒國華寢遊俊造之

林久待弓旌之聘飄然麗賦嘗親乙夜之觀赫爾榮名
高視東堂之集方聆駿舉俄沐華緘味詞意之稠重增
鄙懷之企悚

回舍人

右某伏念跡寄近藩坐企閨臺之彥書傳便驛欣聆金
玉之音荷恩眷之稠重慰羈懷之勞吝恭審順綏福履
保固天倪伏以某官道探古先學臻典則資嘉猷而悟
主發素業以濟時言成絲綸方演筆端之妙禮有沿襲

更資綿蕞之精朝倚碩儒日期柄用式臨庾伏正遠賓
趨敢冀上為廟朝精調寢餼

回致政龍圖

右某啟竊審某官通奏中宸請辭近著援大夫傳政之
禮慕至人佚老之談矧久踐於禁塗加累藩於戎翰聲
猷茂著體力方強遽懷止足之心深伏冲高之度猥承
華幅曲謝堅誠雖景企以良勤載銘銜而弗已乃情所
嚮臨啟寧周

回杭州知府待制

右某伏審某官出殿名邦升華內閣暫輟中臺之貳往
專方面之權地據上游控全吳之都會兵鈐一道制百
粵之襟喉允屬高才式當重寄敢意撓謙之德曲敦求
舊之情竚牘為儀獲覩春華之麗藻風期采芻更欣寒
栢之後凋感抃兼深敷陳曷喻

任左丞回外任兩制

右某啟此者叨被恩綸擢升省轄才非其稱愧積於中

伏念某生質無奇福基甚薄流離多難出入四朝會府
複門已玷一時之選遠塗暮景本期三徑之歸詎意僉
諧更加獎擢此蓋某官素推公議每借味言方慙誤寵
之優繼辱榮函之貺仰銜眷惠曷勝名言

任右僕射謝前宰相

右某啟此者欽膺朝制擢預宰司惟幾政之倚平宣瑣
材之足任辭恩弗獲充位為慙伏念某識昧大方器非
遠用荷四朝之樂育逮二聖之眷知進叅管轄之謨殊

乏涓埃之補方丐退藏於閒燕敢期冒寵於鈞樞不愆
不忘素乏胡公之善非勲非舊但懷文本之憂此蓋某
官表式斯文衡平多士曲記與游之舊陰推引類之私
施及孤愚越叨圖任望平津之東閣莫遂披承覽蕭相
之前規徒深景仰方修竿牘遽枉緘滕祗承惠好之音
倍深感銘之素

任右僕射回外任兩制

右某啟此者冒恩庭制登職宰均重惟衰老之餘猥被

咨俞之寵位槐匪稱據蒞為憂某官義篤相先交隆久
敬樂贊言綸之出首貽占牘之儀摘藻為春情與文而
俱縟發函如面感將抃以交深祇服謙撝莫殫言諭

乞致仕上二府

右某啟伏念某所賦不厚自知甚明少無過人之才累
歷清貫晚叨輔政之任終致煩言自解去於近司尚冒
承於異數假真祠之使領就樂土以家居荷全度於大
鈞獲保躬於晚歲優閒過甚疾疹彌加膚革不仁固難

勝於冠冕桑榆已暮姑待盡於衡茅輒傾肝鬲之誠仰
讀黹旒之聽丐從散秩歸保餘齡伏望某官推惻隱之
深仁運代工之洪造入陪坐論特啟俞音倘緣陶冶之
私俾遂丘園之逸不獨退處閒燕幸終老於士鄉庶幾
訪尋巫醫稍扶持於病質果諧願望實出生成蘄嚮之
誠夙夕於是

致仕謝二府

右某啟此者拜恩朝綽歸老鄉閭擢孤鄉崇貴之官躡

舊相退休之秩寵光踰分感懼交懷伏念某一介儒生
四朝榮遇出入將周於五紀夤緣偶玷於三階鼎足弗
強幾覆鹽梅之實施心已拔尚霑雨露之濡久竊燕安
寢成沈痼視陰愒日每驚疲曳之年苟祿饗榮自愧婆
娑之事屢抗章而告老蒙賜命以曰俞聯禁職於真游
獎其歸志返衡門於京口養此餘齡恩數過優甄成有
自此蓋某官代天化育秉國平均啟沃心而在公進退
人而盡禮曲徇孤危之懇免貽殆辱之譏敢言願棄於

人間希蹤前哲姑欲待終於牖下歸骨先原荷德不貲
馳誠無已

回殿前太尉

右某啟伏審顯膺庭告進職殿巖擁新鎮之節旄視上
公之禮秩遠趨嚴召榮拜異恩竊以某官識洞韜鈴學
敦詩禮世服忠勤之節躬兼儒雅之風入則總親校於
內庭出則抗威稜於邊閫勲勞夙著聲誼益隆輟帥府
之閑謀肅提禁旅陞將壇之重寄密衛宸居方慶寵光

遽貽華翰欣銘兼至教諭奚彈

回中書侍郎

右某啟此者上閔衰遲詔容退老仰拜遷除之命俯全
進退之方企望時賢固慙伯玉之在後重惟恩舊最叨
鮑叔之深知已布懇誠具於竿牘豈謂某官情敦雅素
義篤始終不忘久要之言薦講平懷之禮尺牘隨天書
而並至宣毫與手跡以相輝雖子孺遠權不在自言於
長短而孟公隱几率皆有意於親踈姑恨殘骸難勝重

貺崢嶸晏歲修盪遙塗無階賓閣之趨但祝生經之衛
上符注意下慰具瞻

回殿前太尉

右某啟言念衰遲暮景久辭拱著之榮誕育初辰方切
免懷之念豈謂某官敦修契素講叙彝儀白雪長言借
華褰於麗句南辰妙相形善祝於餘齡集鑪薰壽筭之
芳兼篚帛仙巾之飾義全金石豈輜薄之能勝地隔川
塗悵披承之攸阻永言佩服姑用傾馳

回中書副閣舍人

右某啟近審榮膺詔檢峻陟詞垣進增近著之光華雅
副清衷之簡眷竊以帝王之制煥典冊之文章臺閣之
規著雷風之號令鋪張治具鼓舞人羣必資博雅之才
共贊幾微之務伏惟某官文高體要識洞淵源以昂霄
聳壑之姿副絕類離羣之選紬書史觀夙推良直之風
持橐從班益盡論思之效方欣明命遽枉騰音獲窺破
的之辭深歎湧泉之思仰銜謙德采激懦衷

回知府待制

右某啟向審易鎮雄藩升華內閣式表循良之效實叅
侍從之榮賢業有光僉言惟允某官器能閎博智識淵
微踐更要劇之權著見事功之敏囊錐脫穎庖刃發硎
擁節分符出則倚蕃宣於巨屏簪筆持橐入則備顧問
於通聯蓋能兼政事文學之科是宜居方伯連帥之任
將疇治最別副眷求詎意謙撓遠紆華翰欣銘茲極敷
諭美殫

回校書學士

右某啟近審某官拜命嚴宸校文中秘輟壁水橋門之
望躋蓬山藏室之華絳帳傳經已發韋編之奧青藜照
坐正刊蠹簡之訛聊假清塗遂階近著竊慶絲綸之寵
遽煩竿牘之儀祇味雄辭衆欽高致悵拊塵之未逮徒
置袖以無忘感佩之誠敷陳曷喻

回給事

右某啟伏審自蓬閣之上遊升瑣闥之要路淵衷圖舊

輿議允諧伏惟某官學繼聖門譽偕賢世久次師儒之
任益推經行之高鳴玉納言入則侍清閒之燕左符半
竹出則宣愷悌之風縈滯有年峻遷特異東臺審讀之
政出令惟嚴西清訪對之謨沃心無間竊聆成命增慰
私懷豈期眷顧之勤先枉賤勝之貺出於謙借姑用銘
藏

回奉禮宣德

右某啟近審顯膺明命再擢詞科錄成均升選之恩正

司馬論賢之日名實既定資格遂殊矧惟適變之才素擅通倫之學考言詢事固嘗超拔於賢關發策決科已復攬收於英彀迨茲寵渥實啟華塗猥煩占牘之儀獲閱栖毫之妙乃誠感抃曷喻名言

回秘書學士

右某啟近者某官簡自上心擢居秘府錯薪刈楚選於衆而拔其尤舐墨和鉛博以文而審其是朝惟籲俊時號得人矧繫素履之賢雅著士評之譽一言合契萬乘

改容亟頒芝檢之優恩躋進蘭臺之美職平日育才之地聊刊正於舊文異時迪哲之功佇鋪張於偉蹟辱榮辭而見及佩雅眷之不遺感與抃并情非言諭

轉宮保謝宰執

右某啟此者祇恩中詔進秩青宮事出甄成感盈心抱伏念某所憑不厚微幸實多少也入朝寢竊器名之重老而謝事尚叨祿秩之優適當時制之期仰矚天飛之運大賚四海仁恩溥洽於函生叙進百官寵數特加於

舊老逢時有慶服寵增榮此蓋某官夙播大鈞曲全晚
節邁風雲之亨會被綸綍之優除一品班崇豈耄昏之
宜稱三階路隔思占叙以無由佩服恩私漫馳誠素

回廬州知府舍人


右某啟伏審光膺制詔移鎮淮圻復書殿之清資總兵
鈐之要地寵榮增煥朋舊相懽竊以某官夙富宏才少
馳敏譽論經帝學名動公卿之間奮藻詞林職居禁近
之要三已宣渝於直道九遷寧滯於遠途再陟近班仍

藩舊治郭伋之再至所部聊慰兒童望之之雅意本朝
宣淹郡吏上知已久峻召非遙士論傳聞方喜俊賢之
進用行人遽至遠承賤牘之謙撫自顧衰遲何勝眷記
炎歊在候披奉未期冀倍保於寢興庶少符於系詠

回通判都官

右某昨者被命中宸得麾近壤側聆時彥方貳政條匪
徒適求舊之懷兼亦遂依仁之願忽紆華幅曷示遜辭
荷曩眷之未忘刻丹誠而不已伏惟某官富文敏學博

識周才始擢秀於上科累試能於劇務郎官清要久更
踐履之榮詔旨寬和參賴布宣之畫顧慙拙用幸接事
聯佇諧親揖之期併抒傾輸之素



蘇魏公文集卷五十

欽定四庫全書

集部

蘇魏公文集卷五十二

詳校官庶吉士臣朱理

檢討臣何思鈞覆勘

總校官進士臣朱

鈐

校對官編修臣盧

邃

謄錄監生臣施

華

欽定四庫全書

蘇魏公文集卷五十一

宋 蘇頌 撰

碑銘

翰林侍講學士正奉大夫尚書兵部侍郎兼秘書

監上柱國江陵郡開國侯食邑一千三百戶食

實封二百戶贈太子太師諡文莊揚公神道碑

銘并序

淳化五年冬十月真宗皇帝以壽王出閣尹開封朝廷
慎選府僚輔導明兩於是驛召鎮安軍節度行軍司馬
楊公為左諫議大夫充開封府判官至道元年秋八月
春宮建兼太子左庶子三年三月儲皇踐極由給事中
拜工部侍郎充樞密直學士兼秘書監再遷禮部踰年
以衰老求解近職進兵部侍郎未幾特置侍讀學士秩
如內禁公以本官充翰林侍讀學士兼官如故夏侯嶠
邢昺呂文仲竇並命也上日賜會秘閣寵以七言御詩

儒學之官一時為盛以公春宮舊僚眷待尤異每清閒訪對從容言天下之事多至移刻造辟之論世莫得而聞也方將圖舊熙功記善惇史屬邁足盍移告家居璽書銀璫診問旁午仍以御封上藥賜之咸平初郊不及陪扈特詔賚物如侍祠仍進封江陵郡侯未幾輶輅北巡公昇疾辭於苑中上諭以勉進醫藥不久當相見及駐蹕大名又以手詔問平安好否三年正月二十三日車駕還都遽遣中使慰諭後二日以疾不起聞上為軫

惻久之特輟視朝一日贈兵部尚書降內司賓至其第
賻錢五十萬帛五百疋又賜祥符縣之北常村塋地緣
葬所須皆出王家錢內侍任文慶實監護其事詔以其
壻太常丞譙國宋公臯直集賢院外孫常山公綬為太
常寺太祝姪孫偃集並同學究出身蓋聖主所以尊賢
憫舊推往撫存終始之恩至矣公諱徽之字仲猷胄出
華陰著姓漢太尉震七世孫信安侯嚮之子奢仕晉鬱
林太守永嘉南渡徙籍上饒奢之十五世孫光翼唐上

元中為信州刺史以劉展亂江左遣其子建安令宣挈族人歸於閩因家浦城遂占數建安焉子孫累世以財力擅州里公之曾祖式辟王潮參謀軍事未幾辭歸終老於家祖郃當唐季盜起率合義徒千餘人保守土境補閩義軍指揮使累官至本州防禦使考澄生戎馬間獨業文史嘗以策畫干忠懿王王一見奇之表置幕府俄假緋衣銀魚為本縣令卒官以子貴贈尚書禮部侍郎公禮部次子也少刻學自立不妄交游邑人江文蔚

欽定四庫全書

蘇軾公文集
卷五十一

三

善詞賦江為能歌詩並延置客館切靡友善遂與齊名
聞潯陽之廬山學舍甚盛因往肄業屬李氏失政不欲
仕其國乃潛服間道達於汴洛贄文公卿間特為賓儀
王朴所知王公答書以奇士目之周顯德二年第進士
同奏名者十六人世宗命近臣覆實惟公洎李覃何儼
趙隣幾中選解褐秘書省校書郎集賢校理歷著作佐
郎右拾遺實儼薦同修禮樂書時相范質尤器待之國
初加朝散大夫出監唐州方城縣商稅值故人奉使廉

訪謠俗公見之因言主上應天順人海宇寧一宜崇尚
儒術以厚民俗使者還具白其語頗拂上指左降鳳翔
府天興令府帥王彥超籍其名待以賓禮蜀平徙嘉州
峨眉令開寶初復佐著作劉溫叟任御史中丞十二年
屢求解職不許及卒太祖問宰相朝行中誰可繼溫叟
者薛居正對曰楊某即溫叟所放進士節行清白亦相
類也時雖不果用然朝論自此以舊德處之出知全州
太平興國中再轉右補闕代還陞見日太宗顧左右曰

朕在藩邸即聞其能詩因盡索公之所著奏御凡數百篇仍別獻謝章其落句云十年流落今何幸叨遇皇王問姓名他日又獻雍熙詞十篇上皆稱善用其韻以和答焉自是聖藻宸章多得別本之賜嘗屬疾敕上醫視之賚錢三十萬皆非常比也歷侍御史庫部員外郎更判刑部南曹同知差遣院賜紫衣金魚太宗留意儒雅日閱羣書詔翰林學士李昉等采前代文章類為千卷號文苑英華謂公遽於風什專俾編詩為一百八十卷

端拱初由兵部郎中拜左諫議出知許州入判史館加
修撰兼判昭文館集賢院因次對上言方今取士多以
文詞罕用經術望詔太學增博士員選通經耑門之學
擢以本官分教胄子用廣風化太宗深嘉納之謂輔臣
曰楊某儒雅之士操履無玷寘之館殿得其宜矣元夕
預召乾元樓觀燈上喜其老而不衰蓋有意於器使也
公性方介疾非道以干進者每言溫冠用擊搏取貴仕
使後輩務習趨競禮俗漸薄矣察斯言可以知其趨舍

之所存也時樞密副使劉昌言翰林學士張洎錢若水皆不次進擢而右計使董儼方圖柄任嘗謂公曰上待二翰林甚厚旦夕且大用矣後公語直史館錢熙旣而達於劉張二人指摘以為公構飛語中傷近臣上聞而惡之不復問狀即日貶山南東道節度行軍司馬未行易鎮安遂陞王府方公之斥也年過七十矣自以為沒世不復用矣而人亦謂之老且廢也然而斥未數日而易近鎮又數月而登藩朝之選非上所寵遇而厚信

者莫得而與焉而公出左官首當斯命非夫文行業履之素茂豈能取信於人主非上之誠明待下不疑亦不能排衆毀而獨任卒所以護翼儲闈成令聞者由夫知臣之明而信道之篤也公初拜府僚自坡省至貳卿凡五命皆與故相畢文簡公同制而公位其上景德初真宗登用舊人畢公自兵部預政事踰月遂冠鈞宰而公以耆年先薨故不及大任然以儒者起遠方值世故涉險難而達中朝端邁龍興薦遇好文之主晚年遭會風

雲得以行其所學雖不至公卿亦不為不遇也公純厚
清素外無矯飾仕數進黜不為夷險易其守而博聞強
識出於天質善為清言好論典故自唐以來士族人物
風流雅俗悉能詳記聽其言亶亶不絕酷信瞿曇修因
之說居常以五鼓夙興盥漱誦黃卷如是者三十年猶
一日也加之保守名節兢慎不懈故自結髮至於啟手
足未嘗有過事當時論者以謂孔子所云善人吾不得
而見之又曰吾未見好學者公之謂歟平生以風鑒自

高而寡合於世前輩惟故相李昉貳卿王祐深相推挹
僕射石熙載參預李穆賈黃中與為文義之友識翰林
王禹偁於布衣時薦戚綸任館閣是二人者卒為名臣
雍熙中從孫南陽公億初以神童召對君相以為異人
間出公猶勉以進修不可已其後高名峻節一代宗師
每叙事質疑其言必稱從祖江陵公云爾其取重有識
如此常戒學者當務三多著述看讀持論尤難屬文須
詞理相副不爾同乎案檢無足觀也所為文章高雅純

重素好吟詠老而不廢對賓客論詩則終日忘倦言六義者莫不宗之有集二十卷沒後上令夏侯嶠取以留中公刻意精思以臻乎大成勞形嗇神以嚮乎具福咸平中王翰林謫黃州未行旬浹之間公三至其家慰勉開釋情禮備至時人旣服其風義之敦厚又歎其精力之強固非夫鍾秀之異而純守之固能至是乎初母夫人章之在娠也夢朝南極見老人拜以為母他日又夢大星隕於室噲而吞之旣寤嚙中尚熱無幾何而公生

及薨之前一夕冠帶仰瞻於庭下歸而趣家人治後事
曰吾之星位退矣翼日遂捐館宣儒宗耆英生皆稟精
文象歿則反舍於辰房乎公享年八十室中年王氏尚
書金部郎中澣之女繼晉江王氏國子博士仁郁之女
號太原郡君後公十三年卒自卒及葬真宗再遣中貴
人以緡帛恤其家公無子一女前夫人所生三歲而失
所恃繼夫人躬自鞠毓逮於笄字歷選良匹遂歸譙公
累封鄭國太夫人賢明通書治家有法子即常山宣獻

公也公薨時方十齡而超異夙成克荷後事圖書素業一以付之惟宣獻公以文章道德顯赫兩朝佐佑仁皇再登宰政號令風采為時宗工雖德業所基本乎世闕而緒風克紹抑自外門景祐二年冬十二月宣獻公奏䟽上前曰臣之外祖早事先帝在天府為上介在春坊為首僚際會龍飛待遇無比但謝之日恩備始終官應定謚而故吏失於陳請二夫人配食復闕從子加贈之文竊惟聖朝敦獎世臣宜蒙褒賁非敢以臣備位輒覲恩

榮是月制以太子太師樞章文莊公誅策告其第又以京兆太原二郡夫人追命告配室於時鄭國方康寧在養躬拜綸函承顏顯親事光兩族士大夫以為慶善之所及也洎宣獻下世嗣子今龍圖閣直學士某終養祖堂上承適重外曾家廟繼修常事自禮部以上奠浦城者則其邑有舊構佛祠勅號等覺禪院以為殖福之地又有施田以飯其淨衆今族孫進士倜主其世祀云楊氏徙建安且六世至公始顯繼以南陽文公其族仕

者益衆故尚書駕部郎中致仕贈太常少卿士彥皆公之兄弟諸孫也龍圖君每惟宣獻之志以謂公之賜瑩密邇都門安宅茲久而神道弗表非所以稱累朝寵飾之意顧謂某嘗學舊史前言徃行父祖之所逮聞也見咨譏述義不得謝又繼之以銘銘曰

惟宋三世章聖初帝與有真賢以相儲貳儲相謂誰揚公畢公朝之舊德時謂儒宗帝旣繼聖乃作畢命公老而亡不迨共政公之道義天子傅師公之操履朝廷表

儀仕躡等夷政譏擊搏聞公高風俗以敦薄學者紛紜
論義交錯得公語言士有規矐公之云亡帝思舊勲宗
無主祀女裕後昆敦恤其家幹以王人孰傳其業付於
外孫憲憲外孫民宗國器京兆家書太史篇記浹洽旁
羅遂用名世佐佑仁宗輔成至治養堂念親欲報之德
頓首上前上為愴惻儲師小君襁章誅策褒厥世臣賁
於宗祏惟祖惟孫有德有言孝承慈顏恩榮外門永錫
祚嗣流其慶源歿而不朽清風尚存古之盛德必有識

表寔緯於埏麗牲在廟公塋浚郊木拱周道揭此銘章
來裔是告

龍圖閣直學士修國史宋公神道碑

叙曰在昔官以世稱而其事著見於後者獨史氏之載
籍存焉司馬遷論著先人所次舊聞班固奉詔續父所
撰前記皆因其緒業卒成大典後之言官守者稱之談
世家者善焉國朝史官無常員惟時撰錄所寄尤艱其
選而宋氏二公載世典領其職起建隆訖天禧述祖宗

創制致治之美洎真宗一朝實錄時則尚書令燕國宣獻公預焉自乾興至治平叙二帝成功盛德之事洎仁宗一朝實錄時則貳卿龍圖常山公繼焉五朝正史二聖編年出於一門父子手筆可謂家世之盛矣傳曰信哉其能成名也其常山公之謂乎公諱敏求字次道宣獻公諱綬之長子也世為趙州平棘人曾祖龜符本州別駕祖臯尚書度支員外郎直集賢院並以宣獻公任政府追贈太師中書令而集賢公又兼尚書令昨譙國

公三世業履勲猷見端明殿學士邯鄲李公碑誌詳焉
公生十年而承家學擢辭據古早有過人者自經傳所
載師儒所傳靡不旁通而浹洽而於唐世及本朝尤為
練達禮樂之因革官闕之遷次朝士大夫之族系九流
百家之畧錄悉能推本其源流而言其歸趣雅為丞相
宋元憲公所知從辟洛陽每訪以故實太師歐陽文忠
公領禮儀修唐史以公嘗僚手書咨事自謂淺陋繁鴻
博之助至於廟堂典故學者疑義莫不從而質之而後

決初仁宗留意藝文參用名實寘公文館英宗綜核羣
臣閱臺省之久不遷者擢公修記史掌名命今上憲章
百王禮文有所損益其論譔之選公未嘗不在其中晚
歲付以史事未逾月紀草成與其長屬奏御上特開資
政殿服鞞袍讀之終篇改容而諭之曰兩朝豐功盛德
賴卿等考求而發明之它日移疾告上方臨集英策進
士顧公不在列問左右宋某安否即遣中使撫問間數
日又命挾醫診視仍召其子官於外者歸省及以訃聞

上憫然傷惻制贈尚書禮部侍郎勅府縣應接其葬事
皆特恩非常比也公以文雅被眷累朝才陞器使終始
隆渥諸儒鮮偕最凡歷官起天聖三年乾元節以父任
秘書省正字寶元二年召試學士院賜進士第慶厯三
年以光祿寺丞充館閣校勘坐赴同舍蘇舜欽奏邸飲
會出簽書集慶軍節度判官以祖母鄭國太夫人高年
請解職留侍京師未幾王文安公刊修唐書表公習唐
舊事為編修官復校勘鄭國棄養服嫡孫重去位仍許

修書於家稍遷集賢校理歷通判西京知太平州入為
郡牧判官開封府推官三司度支判官墜馬傷足出知
亳州召還充仁宗實錄院檢討官步蹇不任朝謁特旨
蠲之由京寺七轉至尚書工部郎中兩以慶恩覃霈一
以唐書褒賞四以考課進秩治平元年同修起居注明
年知制誥同修撰實錄今上登極陟兵部於時英宗大
行梓宮在殯上封者請聽宗室嫁娶太常議不可既踰
年又有言者公曰義服變而練可以嫁娶矣坐前後不

類奪一官以知制誥知絳州未幾復官召還修撰如故
實錄成拜右諫議大夫熙寧三年四月今樞密副使呂
公以言事罷御史中丞知潁州公以草制執政指所言
易其詞以進未旬日今御史中丞李公自秀州判官擢
監察御史裏行公言舊制博士以上再歷通判須奏舉
方得入臺去年驟用京官議者以為非今又以幕職超
拜恐弗循官制之舊即上還其制目因自陳目疾漸解
書命章再上以本官奉朝請歲中兼史館修撰明年加

集賢院學士八年特拜龍圖閣直學士十年修國史其
別使自校勘至右史兩知太常禮院判登聞鼓院官告
院尚書禮部開封府發解官錫慶院考試官契丹國信
使洎陞從官歷糾察在京刑獄判祕閣祕書省尚書都
省刑部工部吏部流內銓禮部貢院知通進銀臺司兼
門下封駁管勾三班院編修宗正寺修玉牒官提舉醴
泉觀再判太常寺兼禮儀院事洎知審官東院提舉官
告院定奪郊赦命官使臣罪犯編排錄用勲臣子孫一

為制策考試官四為殿後考覆官其專領則永厚山陵
熙寧七年南郊皆為禮儀使館伴契丹使河北祭塞河
口編修閣門儀制蕃國朝貢條例詳定元正朝賀儀注
而省寺所沚多宣獻舊服公嗣修其政有光前烈又掌
均公建公牋記攝鴻臚卿護燕國公主究王衛王葬事
以疾不果行其論議則為禮官時少師石中立薨四十
日而子從簡又卒無他子承重嫡孫祖仁不知所以服
公曰按司馬操駁徐邈攝祭議是服宜三年鄭康成注

儀禮期出而虞喪以三年是服可再制祖仁當解官因其葬制斬衰時三禮官執據不一判寺宋景文公獨是公議隴西郡王李用和薨輟朝日通在太廟孟享不坐內公援石保吉故事請補其日徐國公主以駙馬都尉王師約兄為姪奏官公執非是詔即正其名太常前上祧廟迭遷禧祖事已施行既而再三參定公言已有前議不敢預聞遂免連書熙寧初轉對上三事其一曰外官數易吏民疲於送迎願久其職則考績有實而恪位

匪懈矣其二曰河陝舉人以文詞登科者鮮望因科詔令三路與諸郡列薦其行能特恩賜第則朴茂之士還進矣其三曰頃年遣使寬恤民力減放役人而事務仍舊宜酌其間劇省事增人庶幾民蒙實惠其為修撰言館閣四部書猥多舛駁請以漢藝文志目購尋衆本委直官重複校正然後取歷代至唐錄所載第為數等擇其善者校留之餘置不用則秘書得以完善也其論貢舉請州郡置學官專職教導三歲科舉取士三分以二

分待糊名校試如舊式一分依元年赦勅州郡論薦監
司審覈而後奏名太學則主判保薦並赴御試中格者
附榜如此取之數路則羣材不遺矣秘書省論郊廟祝
詞語義有非當請命學士改定使河口還奏河北旱災
望蠲其夏租罷絳守言本郡歲伐山梢八十餘萬其役
特重請均三分一於晉澤二州以紓絳人其後官不數
易太學三舍取士州郡置學官三路取百人繫公開陳
其端也熙寧四年議入閣兩制太常以謂此唐日坐朝

之儀不足為盛禮宜削去之公請如唐坐宣政故事約
閣門舊圖量設儀衛以朝朔望詔可其奏今月朔朝文
德由此始也舊制臺閣官被命別使即中謝後或廢格
公使永厚陵泊修國史皆奏復之觀所舉可以知其造
次必於義而不失職守也其譔著則有書聞集十二卷
後集六卷西垣制集十卷東觀絕筆集二十卷屬詞謹
嚴似權僕射論事簡切似李司空訓辭兼常楊之溫雅
篇什得元劉之清麗蓋有湛深之思初宣獻公輯唐大

詔令未次甲乙公用十三類離為一百三十卷唐自大
中世史記放絕載襪不傳公綴集所聞續武宣懿僖昭
哀六朝實錄總一百四十八卷國朝都汴沿舊方鎮府
寺邸第閭里坊巷增易數矣人罕識其故處者公依韋
述類例撰東京記三卷雍洛故京漢唐遺事洊罹殘燬
其迹熄矣公掇方志洎碑記所載撰長安河南志各二
十卷奉詔編緝則有閣門儀制十三卷集例三十卷例
要五卷蕃夷朝貢錄十卷記當官所聞見與其應用則

有三川下官錄入蕃錄春明退朝錄各二卷韻類宗室
名五卷安南錄三卷元會故事一卷撫唐人物世系遺
事則有諱行後錄五卷纂唐文章之散逸卷部不倫者
有李翰林集三十卷李北海集十五卷顏魯公集十五
卷劉賓客外集十卷孟東野集十卷李衛公別集五卷
百家詩選二十卷復采晉唐人詩歌見於石者作寶刻
叢章三十卷嘗謂司馬遷史記注解疏悟學者罕通其
義訓悉取音義索隱正義王元感陳伯宣別注將倣顏

師古西漢為集注及被詔修百官表續本朝會要刪定
九域志皆未克就嗚呼可謂博矣公雅以善書稱結字
清勁得其家法前奉詔題濮安懿王王夫人神主書御
製韓忠獻公碑及當時公卿士人句請題寫被金石刻
者多矣嘗對延和上問宣獻遺蹟翌日奏七軸以獻自
公之亡未有繼其書名者公姿宇渾厚樂易自得與之
交久而益親平居言笑侃侃不為邊幅表襮一遇事則
毅然據正若不可犯者人亦莫窺其尺寸闊狹三為郡

守皆以修書召去不得滿歲其去也民益思之喜甄獎
人物前後薦士數百訖不為累鄭國太夫人故太子太
師江陵楊文莊公徽之之女文莊無子宣獻逮公繼主
其祭事歲時不絕嘗欲勒碑神道病革猶戒其子亟成
之家書數萬卷多文莊宣獻手澤與四朝賜札藏秘惟
謹或繕寫別本以備出入退朝則與子姪緡讐訂正故
其收藏最號精密平生無他嗜好惟沈酣簡牘以為娛
樂雖甚寒暑未嘗釋卷早與仲弟都官君敏修文章學

問互相開發子姪輩悉能奉循世範熙寧三年昆弟三人同年登科士大夫著為衣冠盛事公久在禁垣時歎榮滯而恬然裕處未嘗以世務嬰慮病中手疏治命止戒子孫勤約清白以紹世風幼子未官而推遺澤以及從孫茲又可以見其所存云耳母夫人常山郡太夫人畢氏故相文簡公之孫公又娶其姪光祿少卿從善之女號京兆郡君室則姑子家則婦姑慈和靜專濟美圖訓前四年逝公以世教浸薄禮服簡廢特制杖期以稱

哀情言禮法者善之子男九人慶魯殿中丞匪躬著作
佐郎二早夭尚賢將作監主簿正功大理評事表微揆
方將作監主簿處仁始名女子二人適贊善大夫王佑
秘書丞呂希純並先亡孫八人煇將作監主簿燾煜燭
燧輝灼皆未官孫女七人長適太常寺太祝曾說次適
白馬縣丞范祖德五幼未有行公年六十一以元豐二
年四月甲辰終于春明坊之適寢以其年七月癸酉葬
管城縣馬亭鄉東城原宣獻公之右次旣葬矣諸孤泣

血奉遺事抵僕曰先人平生相知之在朝者無若翰林
范公洎公之久且深其葬也范公銘其壙矣今埏隧所
表宜得公文以載於石二者蓋先志也僕惟三紀交遊
趣舍不異仕宦出處亦畧相等懿文美行尤詳其始末
銜悲紀實故質而不文銘曰

皇世隆儒以文致治士陶其化超然特起荆山瑾瑜喬
林杞梓或生遠鄉或出門勢遭時並出蔚為邦器廟堂
彬彬臺閣濟濟如古哲王思皇多士代有名家克濟其

美彼美常山族茂枝繁風流儒雅奕葉蟬聯鴻都秘館
由祖逮孫言論史經父子演繹惟宣獻公輔翊仁宗議
論閱遠詞藻深雄一時標準萬事中庸經邦貳政德爵
偕隆公踐世職徊翔閨掖朝廷典章禮樂沿革祖述源
流貫穿今昔聞其話言士有矜式宣獻之文公實嗣之
宣獻之博公又繼之寵祿方至謀謨未施徒留故事載
在攸司公登史觀天子所選考紀初聞賜對清晏袍服
改容覽書稱善聖言褒賁委成大典公疾不朝集英遣

使挾醫診治召還其子公之云亡上嗟良史贈官詔葬
不以常比馬亭之東父祖有墓豐碑重屋隱然宗阜公
穴其旁不百舉步雙螭相望揭於衢路公之遺風士所
嚮慕公之令子克承厥緒君子之澤何有世數施乎無
窮茲丘以固

蘇魏公文集卷五十一

欽定四庫全書

蘇魏公文集卷五十二

宋 蘇頌 撰

碑銘

太子少保元章簡公神道碑

國朝登用輔臣盡循唐舊乾德二年太宗皇帝始置參知政事以貳宰職六聖繼承遵守不改自乾德訖熙寧百餘年間得人之盛見於國策者七十有六人或以文

學進或以武功顯或自右樞而叙陞或由夙望而入用或以臺閣久勤而次遷或以藩州治效而超拜卿材國器相望於廟堂從而正宰衡執邦柄者常什七八焉若乃耆德宿名體備數器政事為良吏表儒學為羣彥先出入藩朝既勞且舊有如故太子少保致仕贈太子少師魏郡元章簡公者幾希矣公諱絳字厚之杭州錢塘人其先本危氏案崔琳姓苑危姬姓也後封於新世久寢微秦漢以來雖有仕者未甚顯大其一支著臨川郡

之南城縣世力農以財雄鄉里唐季江淮寇盜充斥公之曾祖諱仔倡與其兄全諷鳩合鄉人即所居立壁壘遠近依以為援中和五年破黃巢之黨柳彥章於象牙潭天子以全諷為撫州刺史仔倡信州刺史吳王楊渥克定江西撫州降吳徙江都信州奔錢塘遂易元氏生公祖諱德昭武肅王稱制用以為相官至右僕射兼侍中晉國公晉公九子其八廕補王官幼子諱守文入朝中咸平進士第官終大理寺丞知白州公之考也公幼

孤流寓江湖卓然自立向學不急九歲謁荊州太守孫公冕面試三題以神童薦於朝貧不克行十八拔開封進士薦廷試優等以聲病降同學究出仕迫於親養不遑擇祿調楚州淮陰縣主簿歲惡蟹蝗害稼民戶訴災轉運使按狀以為無損公親履田畝覈實蠲租上不能奪是歲楚之四邑獨淮陰民免轉徙之患鄉貢再上擢乙科授江寧府觀察推官明道旱災江淮薦饑官發廩米為糜淖以哺流民公職其事躬自給視饑病者數萬

皆得以濟大尹李康靖公安撫范文正公上其事召見
改秘書省著作佐郎連知吉州永新通州靜海二縣或
以治劇選或以幹裕薦並書課聞於朝擢江西轉運判
官職罷願試繁郡會天台水溢城郭漂溺千餘家被命
知台州至則出公庫錢即民故居作廬舍令自占期三
歲償所逋又甃其城牖其門以捍江濤之患自是水不
敗城郭代還權三司度司判官屬甘陵兵旱之後道殣
相望庾無見儲責在度支公為之校耗登調盈虛轉它

州羸粟給助其乏踰年出為江西轉運使奏除一道民籍丁錢貧老者蒙利尤多皇祐三年廣源儂蠻寇二廣守漕皆坐失律免官朝廷旰食為擇使者就加公直集賢院充廣東轉運使始踰嶺徑趨賊衝躬相隘險瀕江建水砦數十繕治諸州城樓堞戎器纖悉如法上聞特遷一官歷兩浙河北轉運二司鹽鐵副使擢天章閣待制知福州治平初拜右諫議大夫以給事中知應天府兼南京留守徙河北都轉運使過都陞對奏陳中外利

病英宗皇帝面稱之曰論事者無如待制忠朕弗忘也
神宗即位進尚書工部侍郎以待制換集賢院學士是
歲遷龍圖閣直學士知廣州時南方歲凶盜熾州郡多
故凡五歲中連徙越荆鄆三州皆兼一路使職未至鄆
召入翰林為學士公早以文學擅而久更吏劇負其夙
志雖簿書填委而未嘗輟簡編捨翰墨晚遇知己之主
翱翔禁複得以攄發其蘊故制書詔令純深溫潤切於
事理至於一篇一詠往往出人意表秉筆之士以此多

稱美之加又抒思精深長於應猝初景靈宮諸殿落成
須上梁文詔以屬公薄暮受命黎明奏篇上上深賞激
都下競傳誦之明年知開封府滿一歲罷兼侍讀學士
未幾權三司使坐屬官遺火焚省舍落所兼學士無幾
何復職領羣牧使熙寧八年冬拜參知政事公自預政
每進對上前敷奏詳悉曲盡誠款諸公論議或同異公
無所委隨惟正之助而謹畏慎密雖對子弟未嘗及省
中語也上雅稱公文詞高妙近世少儼足為朝廷光采

雖在中書猶欲以辭令諉之每蕃夷書詔必令視草而後遣越三歲告老於上曰臣年政七十矣願乞殘骸歸故里前後表請面陳至踰十數上敦諭再三又遣中人持還其章他日謂曰聞卿子耆寧孝謹好學今使之校書崇文以畱卿二朞公惶恐固辭不獲旣而謂親友曰上恩如是非孤臣之福自茲吾不知稅駕之所矣元豐二年春太學起虞蕃詔獄扳公嘗以族人伯虎語博士孫諤風祭酒補小學教諭辭逮耆寧名捕甚遽公駭不

知所謂入訴於上曰者寧幼失所恃未嘗跬步去臣左右父子更相為命二十餘年矣倉卒對獄實虞非意願納臣平生祿職以贖其命使即訊於家事之是非輕重一切聽報上惻然許之御史猶脅迫伏辜又詣府第以簿急責公公不復視遽取筆答具獄曰御史所訊皆是遂以本官出知亳州初獄成或謂公曰伯虎補職且半年者寧未捕前數日方知以白公是豈有禱也諤又未嘗造請安得私語事此一言可以自辨公曰吾大臣也

既以告上矣今若自明是前言不盡也豈有大臣對上
言而二者內省無愧復何辯為卒無一言及之至陛
辭上察無它賜坐慰勞曰毫若非便易陳許可乎公謝
曰既蒙保全不誅又使擇地其敢自便若聖恩不遺得
支郡如潁足矣即命改知潁州曰一歲即召卿仍使服
金艾如學士以寵異之明年加資政殿學士知青州詔
許入覲遂留提舉中太一宮公志欲休老章又十餘上
告病者數四一日上臨講邇英特召公面諭曰卿志力

未衰尚可備左右勉為朕留進讀對曰西夕餘景無幾
不幸顛仆而去或溘死不得歸骨先隴即目不瞑矣上
深喜其誠至四年以太子少保致仕既辭上曰卿預政
中立不倚比有間言者朕自知之今既罷去無嫌可營
居京師且使者寧仕宦朕當助卿費公曰臣有吳中敝
廬倘可售即如詔旨特命二子分領鴻慶洞霄二宮俾
居家就養行次畿縣又遣中使賜白金千兩戒以早為
還都之行其恩意終始隆厚如此既至吳脫略世故不

問家之有無優游宴樂吟詠情性超然若出風塵之外
後三年薨於家寢訃聞輟垂拱朝一日贈太子少師初
上覽遺奏謂左右曰此表必元某自為者即日馳內侍
問諸孤法贖外特賜百金戒其家集平生所為文章來
上凡四十卷藏於秘閣公生大中祥符己酉終元豐甲
子以天聖丁卯登仕以元豐辛酉納祿起州縣歷中外
華要而至丞弼自著作佐郎十三遷至尚書工部侍郎
官制行換正議大夫五易封爵至魏郡公凡九鎮藩郡

而兼一路安撫鈐轄者四六經使任而江西河北皆再至入朝典領臺閣諸宮觀更踐省府揔十一職所至皆有治效而閩廣京兆善績尤著至今人猶稱道之以二品致政耆老富貴康寧考終壽七十六在仕五十八年修潔寡過保躬全名善始令終世鮮其比薨之明年某月某日葬於杭州錢塘縣某鄉某里去祖塋幾里所夫人太原王氏封某郡夫人蜀郡王氏封某郡夫人並祔公塋二子長即耆寧今為某官次耆弼某官兄弟孝謹

善守門法敦睦友愛未嘗相離出入動息如公存焉二
女一適尚書司封郎中李平一一早卒五孫延祖似之
早卒紹京紹直紹孝並假承奉郎公生始孩稚穎拔不
類常兒乳保嘗負之過佛室見所謂觀音像者輒喜笑
若素所熟又指黃卷中普門品經欲持取去家中止之
則啼號不已聞者嗟異以謂宿習之說不妄也性至孝
自幼服勤親側不懈晨夕太夫人嘗寢疾寢亟公憂悸
不知所為默禱於天願以已代親所苦恍然若神示其

象已而遂愈洎太夫人棄養服喪毀瘠葬祭不踰禮制
昆弟六人及子孫未有官者皆用公廕補入仕又市良
田以贖族人之無祿者自少長拊存周至卒無異言其
孝友敦篤行義如此公少歷艱苦周知物情儒術吏資
蓋得之天賦非勉強所能及接物極和易與人言洞然
見底裏至臨事則嚴毅立斷下不能以毫毛欺給在江
寧攝治府下二邑戢狡吏撫疲民治譽藹然鍾山有民
妻訴夫夜醉歸道為仇人折足至家而死公默察妻泣

不悲遽使歸聽命既去陰遣吏躡迹見與一浮屠笑語
立捕繫一訊而得姦狀實浮屠私其妻期是夕會於家
既至夫寢覺而遽起為所戕卒寘於法橫山王氏子恃
富不法常賊殺不辜里民目為王豹子莫敢與校一日
因事追下獄公數其宿負榜殺之鄰里親戚莫不稱快
永新土豪龍聿者嘗誘同里少年周整飲博以姦勝整
千緡準其上腴田以償直初猶代耕輸穀歲久遂割占
其田整母方知博事訟於縣則母聿存焉於州於使者

至槌登聞鼓皆不能直公至母又以告公視契一言以
辨其偽聿具伏歸整田或問公以何見其偽曰始視契
日月在母手印上是必得母他牘尾印以續偽契問之
果然一縣驚嘆以為神明其典州使部不為赫赫名察
見吏民隱慝纖悉不差然意本在寬情既得則縱舍不
窮其細故未嘗以文致人罪有讞獄集十三卷摠五十
五事觀其書可以知公之所存皆得於平易忠恕也公
病世俗靡薄朋友道喪嘗後已以從衆故與人交久而

益親人皆稱公長者還吳日與鄉閭耆舊相過從遨遊
江湖處布衣野老間無辨也內外掃之日初無吉疾無
治命嗒焉順化人以為吉履之報焉公之薨也門人某
官某狀公之行以告於太常考功集議謚曰章簡其葬
也今資政殿學士龍舒王公銘公之德納諸陰堂舉是
二者可以傳不朽矣而嗣子猶以為未也曰狀藏於官
府銘置於泉塗見者益寡禮令有碑揭於神道可以聳
來世之觀聽也謂予早與公周旋尤詳行實假文以刻

於石言念疇昔音旨如昨追而叙之一二可記公之在翰林也予方在朝廷每訓辭之下及應用手筆碑表詩歌多得覽觀其體制深重章句清裁傳在人口皆出新意由是知公之文無所不長也又嘗與公持論前言往行講尋源流或推究天人善敗之應互叩其所蓄往往更相推許由是知公之學無所不綜也昔公使南海當寇鈔之餘經畫尤多時予邕州從父守英州禦寇亦與有勞嘗云方寇之去也東廣生聚無不被其毒者非惟

獠虜之遺孽抑吏卒乘亂剽掠甚於賊鋒無能摧卻者
洎公之來也戢兵保民咸有條畫饑凍者得其衣食流
冗者復其居處與夫驅除俘馘之勞殆不侔也由是知
公之卹民弭患之功遠矣公之得謝也予方謫麾橫海
相遇都下留連眷眷幾不忍別遂媁姻好至誠悃悞不
以先後改觀此又知公篤於舊故雖古人之所謂久要
不忘者何以過此故予嘗懷之未始忘也因孝嗣勤請
得以詳其實告於後人亦公之雅志也銘曰

元出於危其原自姬始有新邑世久寢微南城之族力
富農貲逮公曾門遂顯於時曾門弟昆殄平孽虜臨川
上饒析唐符土上饒入越從事伯府授氏承家實生公
祖憲憲公祖遂相錢塘克大厥宗九子騫翔大理逢辰
詞科奮揚德厚位卑再世其彰其彰謂誰宮保是嗣特
起江湖拔出羣萃方進孤童不汙下吏平津經術再登
上第試政州縣惠弱鋤強上嘉治行寘彼周行中庸萬
事勤勞四方有威有惠一時之望入陟公台神皇所簡

曰惟汝賢恨用之晚公亦感慨傾輸誠款懇辭異數懼將不免訟興璧水譖起蚍泉刊章橫逮朝聽驚誼上察非意公終不言去位未久朞年復還公屢告老章踰十上召對邇英一一咨訪詔寵其歸道塗賚餉官其二子使歸就養公既還吳丘園是居朝昏湖嶠左右琴書耆老過從肴尊宴娛安時處順冥然化俱公葬武林反祖舊服墳闕崔嵬江山重複過者下車敬瞻喬木誦歌遺德清風肅穆

錢起居神道碑

仁宗皇帝濬哲聰文臨御歲久朝廷治定天下晏清雖
天德高明神機默運人不可得而度思然跡其可見者
虛懷納善樂聞讜言天聖中詔復方正直言之科慶厯
初增置諫官御史之員於是抱忠懷道之賢博古能言
之類策慮愍臆傾輸腹心啟沃聖聰日月相繼一言寤
意則褒揚獎進聽用無間其逆旨拂心詆訐過正則優
容曲全甚者黜而復用終不以言廢人故四十二年之

間近臣盡規衆職修理朝無闕政理絕名言士有特起
邁辰雜選並進登仕密位公台出此途者蓋十七八焉
非特竒才異倫間出一時實由天衷樂育獎而成之所
致然耳於時有若故起居舍人直集賢院知諫院會稽
錢公越自朝行入奉大對受策察問五千餘言推原天
人指切時政天子親覽稱歎移刻考官奏第三書異等
超擢臺郎試守藩郡士人傳豪遍於海內咸以謂仲舒
之淵源劉蕡之切直劉向之發於至誠邵誥之對揚天

問復見於茲時矣先是真宗皇帝景德中再闢六科公之先君翰林公褒然首舉慶厯初公之亞弟端明公復中茲選後四年公又繼之一門之美前世未有當時詩人詠歌有賢良方正舉父子弟兄同之句士大夫載述以為衣冠卓異焉公諱彥遠字子高系出錢塘吳越武肅王之裔曾祖諱元瓘晉天下兵馬大元帥嗣國王薨諡文穆祖諱侔遜位於其弟以王爵為東南面都元帥國朝累贈太師尚書令中書令父諱易少舉進士名動

京師歷內外制典兩朝書命累贈太尉妣盛氏江東著
姓太子太傅文肅公之族屬追封平陽郡太夫人公弱
歲而孤與仲氏僑居輦下執喪盡禮奉養太夫人溫清
弗怠刻意家學至於大成初以賞延再命將作監主簿
三遷大理寺丞景祐五年登進士乙科簽書忠武軍節
度判官公事賈許公任御史中丞辟為推直官許公預
政繼職者奏留倚其繩正朝列辭以四推獄官不當越
職尋出通判明州在郡摘州卒謀亡竄海外者鞠會稽

累年田訟數十人兩郡稱治遂以太常博士應詔遷尚書祠部員外郎知潤州六年秋九月也是冬涉春京畿旱災天子責躬詔訪中外得失公旣以言見擢雖在外官而懷不能已復奏䟽三千言上塞詔意是時江淮歲歉丹陽復苦蝗孽公募民捕掘蝗子以常平粟計升斗易之焚瘞殆盡復上其事遂著為令又平粟中價貸下戶計司以為專命損上責所由備償餘直公請歸罪守長金山寺主僧承前宣勅補授郡官待以客禮公至令

班諸寺僧首廷見不與交語既而寺罹火災其徒訟庫
錢乾沒持貸籍欲污郡官公立命焚之止坐僧罪奏釐
甲乙為禪林盡革宿弊吳俗信巫郡官妻病巫俾出錢
十萬禱神請命公竟坐巫詐欺境內神祠非祀典者期
一月毀撤率諸巫習醫自業錢塘繕江堤轉運使調木
石諸州逮潤報以越數州科斂其擾倍常遂止是時籍
宣毅卒隸京步軍司使者留詔須越軍至同遣其衆籍
籍重遷公為奏就選官部閱給舟載其妻孥以西他州

籍兵過城郭騷然至或罷市抵潤則關外已具糧糗薄
暮舍止晨炊徑度城中莫有亂行者治迹表諸道八年
秋召還拜右司諫歲中遷右史帖職公自以逢辰遇知
已之主居得言之地夙夜惟念知無不言言無不盡其
密啟顯奏凡八十餘章深動明聽今撫其十數大者足
以見經世適變之畫有過人者其言毋數赦曰三歲郊
需盛夏慮囚祖宗之制不可闕自外非時曲需不宜屢
下啟小人之幸擇牧守曰請分望緊上中下州為三等

上等政府擇才其次吏部選任又其次依資注擬增俸以表顯覈實以陞降則四方平理可待也慎名器曰文武近臣陛下宜周知其才否稍取其功狀圖列於別殿燕閒省覽凡遇除授案見勞惡而賞誅則朱紫自別矣侍讀待制宜立定員如舍人學士格其勞臣久外當褒進者別製美名以寵之則流品分而中外辨矣議取士曰貢舉法弛士不循操檢宜下詔戒飭俾知所畏有不率者屏棄不齒則佻薄革而廉良進矣議法制曰法令

者一民之信也不宜以小害而妨大利數有變更遠惑民聽格式者立事之綱紀也惟稍增損唐舊今律令並行則一朝之典憲備矣宮省出入宜著門籍以謹誰何衛士犯法不覺有刑不可以近臣而輕其罰則姦萌自絕矣議職制曰諫官御史舊聽風聞言事近稍沮止請舉行天禧詔令所以廣人主之聰明而防壅塞之弊外戚非任邊劇有顯效不當授以軍職所以慰三邊將帥之心大臣年至尚冒寵祿望優加名數聽其致仕所以

全君臣終始之分出疆使介循次而遣苟非其人或為
遠方輕鄙望加遴擇無俾失辭取侮勸農之官職事不
修請立考課法以墾田戶口增損為殿最則吏知本而
民勤力矣古者外官更代有圭節魚符之信今則新官
執勅赴上州郡別無信驗請如舊制復降信勅庶幾四
方有所稟承而絕詐妄也監司案察自有常矩近之奉
使者多事邊幅專懷不通所至鞭笞人吏信任險巧州
縣頗罹其毒望嚴加戒警俾修實効議黜陟曰賞罰之

行惟均與信前年宋祁誤進冊告王拱辰等薦舉非其人並坐罷職守郡今拱辰等已遷用而祁猶滯留進奏院宴會館閣職事被黜者十數人今呂溱已陞擢同坐者未復望悉推恩以示均一內王洙嘗以學術侍經幄望亟召還舊職其論朝政闕失曰先帝嚴塗金之令所以戒淫侈而敦質素也今近戚服用出入宮禁漸不可制宜謹舊防抵工匠法其弊當自絕也京師無名土木勞民費財望戒內外不急修造及佛祠神廟悉皆禁止

須財力稍豐取旨興造方今天下兵籍十倍祖宗時望遣使蒐選罷其疲癯擇精銳以實禁旅官司冒占踰制者悉罷之州縣白直有虛名廣占者宜著定限數溢者悉放還南畝商胡決河累歲不塞議者欲簡力就功此尤非便謂宜重責水官等預計確實功費政府議定然後起役則一舉而成效見矣河北義勇已習兵技屬歲荒徙望詔諸路招諭續食遣歸以室嘯聚之漸內侍黎用臣黥隸原恩除環衛官致仕是罪人與周行勞舊均

禮宜仍隸籍示有以懲肅景德寺病僧言死而漆其尸
寘舊院宜依浮屠法焚瘞郊外以釋羣惑凡此並當時
刑弊事有甚微而干國體議者或以耳目所熟或以流
俗所蔽或以權戚所閹置而不問公直据利害不恤羣
誹先事開說為上指陳或言入即行或播在臺閣開廣
聖聰補益民務者多矣又有事繫刑賞下情不得上通
國憲抑而不行公以為利病較然儻言者不為繩直則
抑鬱徵倖終不復辨方朝廷厭西兵既許議和元昊用

事野利大將梗其謀延州青澗城使种世衡遣間王嵩
謀殺之由是和議遂定延帥抑不以聞會世衡卒其子
古詣闕直其事時延帥方長樞府登聞院過不得通古
以書述本末抵公公即為言朝廷按覆得實贈世衡觀
察使錄古上縣簿尉郭承祐籍舊恩至節鉞領殿前親
兵既罷為宣徽使出知應天府希恩欲留職內院公三
疏摘其宿負以為爵位過重猶深玷國體即日詔趣承
祐行楊懷敏先職皇城不覺衛兵驚撓宮寢出為沿邊

安撫又坐妄言虜事不實罷安撫猶總塘濬入奏遷延
幸進旣而擢入內副都知公累章彈擊及請問面陳詔
錄章示之令却還本任猶不行再言小人傲忤難恕朝
廷綱紀須振於是責授三陵副使權倖由此知警議者
謂以片言移人主之意古人以為難視公之舉則無間
言蓋至誠惻怛聖聰察見如水投石不極不止耳於時
中外泰寧上方圖垂世詒燕之策一日內出手札訪近
輔公即日上對復數千言箴時之闕纖悉無隱皇祐元

年春廷試進士公為編排官上御後廡手書博學二字
賜之四月獲麥後苑觀三朝寶字訓鑒圖於內閣特旨
召公預坐并賜本如近禁公精於治道每預畫訪占對
詳盡時以京師久陰諸路大水上封援洪範傳下人有
謀之應願深遏惡源消陰沴長陽德言甚切至未幾步
直張安挾刃埋諺門欲有誣告公因事入對上猶記前
章語慰諭嘉納面賜五品服是時安南交趾窺伺邊隙
忿爭細故戎瀘蠻嘖言妄有徵索公以為此必蓄異謀

將構外患請預擇守將亟徙東南重兵先事制其漸可
以厭服後二年邕管有智高之變朝廷經制戎瀘幾數
十年方帖然其前識遠圖補患消難之效又可見矣天
子方諏咨眷屬待以不次時論亦謂納言鳴玉高議廟
堂階術在前步武而至矣嗚呼天不俾壽年止三十七
以其年季冬寢病某日終於司農之官舍訃聞上為嗟
惻詔錄其孤移恩於次壻張升卿釋褐許州長社縣主
簿非常例也仲氏方尹京劇趣辦襄事以明年正月已


西葬開封汴陽鄉從先公之次隧夫人丁氏故相晉公
諱謂之孫某官拱之女累封蘇國夫人某年月日逝於
子舍合祔公穴四男子勰翰林學士朝議大夫變朝奉
大夫通判臨江軍蘇朝奉郎通判陳州臨以滑州韋城
縣主簿卒官三女長壻奉議郎李之邵次即升卿今為
朝請郎知泰州幼西京軍巡判官沈述孫男十三人杲
卿宣德郎東萊瀛州防禦推官朝隱承事郎並前進士
魯望端已承務郎壽明德興廷碩賓王伯言君魚邠老

汝士學進士業孫女十人壻皆士人曾孫男女今三十
一人公之風度器識與學精藝趣尚超俗文章爾雅凡
所著述其科舉應詔之文為士人傳誦外得遺稿撫為
十五卷名諫垣集故友龍圖學士宋公次道叙之詳矣
惟錢氏世自武肅王宅有吳越方五季紛擾羣雄割據
擅勝兵僭稱號戕害生聚毒甚塗炭獨吳越一方包貢
不絕朝廷策命恩禮如平時元帥避賢遜位有季子之
節忠懿王最先入朝蒙邾儀之褒弭亂戢兵恭順不失

陰德有後今為信然故二家子孫累葉顯赫近世罕倫
翰林君繼三世采入之榮簡在聖衷光昭前烈而霜露
之感歲時不愆以謂宰木已拱而麗牲未建以某於公
平日從游之舊朋好尤篤嘉言美行皆耳目之間見將
圖金石之刻表章門闕之路以文見屬義不得辭感舊
思賢托銘叙意其辭曰

錢氏自唐跨有吳越屬時紛披羣雄僭竊惟彼武林世
載純節邁我皇運首朝帝闕吳越五君東府逡巡退棲

會稽貽慶後人掌武惟子二惠惟孫賢良方正父子弟
昆赫赫仁宗孳孳求諫司徒竭來大廷利見制策五千
奏篇稱善封章八十沃心無間惟天生德惟聖知賢荃
宰契合藥石功宣時亨運往道卷名全承家有子嗣德
昭前德有報矣神所勞矣考室構矣門閭高去聲矣春秋
時思祝宗孝告已禩九章將陞四廟言瞻喬梓在汭之
陽夷山拱其後京水溢其旁諗堪輿之宿兆非猗韋之
能祥觀金石刻兮過者必下積善之裔兮德音不忘



蘇魏公文集卷五十二